

ABENA KORINTI IBUUKU

LYA KULUNGAMIKA



Mwashibukeni, mwe fibusa! Naceba Munyina Neville, Ndifye uwakoma ishiwi panono muno lucelo, kabili noku ukupuputulwa kuleisa. Ine tekuti njeshe ukushimikila kuli imwe muno lucelo, pantu Ndi uwasasala nganshi. Lelo ibumba fye ilinono ilyesu pano, Ine limbi kuti nakwatafye isambililo ilinono ilye sukulu lyapa Mulungu, nokumuleka ashimikila mukashita akanono. Eico ifwe twala...Nalakwatafye isambililo ilinono ukufuma muli Baibele pano, palwa cintu cimo ico twingalanda nalimo pama miniti ikumi limo na yasano, amakumi yabili. Kabili nalimo Shikulu ali nokutupela icintu cimo ukufuma muli ico. Nomba, Ena aba umusuma nganshi kuli ifwe, umusuma nganshi.

² Kabili, eico, natunaka. Nalicelwako panono ukulala mailo ubushiku. Ndi...panuma Na...Amalamya ayengi yaleisa ukutula apo Naishile. Kabili—kabili Nalimwene, kabili umwana wandi umwaume alikwete mucisansa ubulungu bwamagilashi, alebushetafye nokuyalya, ayamagalashi nokubumina, bwali bwamagalashi. Kabili eico twalimubulile nokuvmusamfya mukanwa kakwe akanono. Nomba twaikele nankwe, inshita iikalamba iya bushiku, eico Ndi ngo wanaka muno lucelo.

³ Kabili Nacifika, palya pene pa twelufu koloko, ukuya ku Kentucky, nokuya ku Kentucky mukukumanya bamo kulya. Kabili, nomba, yu mulungu ukulongana kwesu kuleisa.

⁴ Kabili nomba Ndefwaya ukwesha, inshiku fye ishinono ishakulandafye, nga kuti Nacita ico. Owe...Nshikwete icifine. Nalishimikila nganshi mpaka ishiwi lyandi lyaya. Mwamona, apa myeshi ine, mukutambalala, mwamona. Kabili eico nomba, panuma ya ico, Nkaya ku Canada, nokubwela kukulongana kwesu ukucitika lyonse nakufyalo fyakutali.

⁵ Nomba, ilyo Nacikala palya, ndelanda na Leo na Gene, pa nshita fye iinono iyapitapo, Nacilatontonkanya pe Lembo pano ilyo twingabomfya muno lucelo. Nga i...Nomba, intanshi, nacibafye nokwikala palya pali miniti, Naciba uwanaka nganshi, nomba Nacitontonkanya ukutula, “Ico tacamoneke bwino, ine ukwikala kunuma mumuputule mulya, kabili ulukuta kunse kuno. Mulandu nshi, Shikulu limbi tekuti abwele kulya. Ndefwaya ukwisa kuno uko Ena aali.”

⁶ Eico, Ndecetekela Nimona umo pamilandu iyacindeta pano muno lucelo, Munyina Littlefield ali pano. Ee. Alefwaya ukumona pakashita fye akanono panuma yakulongana. Kabili

Munyina Littlefield afuma kulya ku Tennessee, kulya uko twakwete ukukalamba—ukukalamba ukulongana kulya, nombaline mucifulo cakukoseshamo umubili pesukulu lyamasambililo yapamulu. Nimfilwa ukulanda ishina lya musumba. Nikwisa, iwe, Munyina Littlefield? [Munyina Littlefield atila, “Ku Cleveland.”—Kale.] Ku Cleveland. [“Ku Tennessee.”] Ku Cleveland, Ku Tennessee.

⁷ Kabili eico twalikwete inshita iisuma nganshi kulya. Kabili ena aali mu... aleisa alepita, mukutila “uli shani” kuli ine, kabili eico Namwebele ukbako muno lucelo. Twacilaya kumo kuncende muno lucelo, nakabili, kabili nomba, bacibusa bamo abo Nacilafwaya ukutandalila, tekukushimikila, ukutandalafye, pantu Nalibalaile. Kabili nomba Munyina Littlefield eko aciba, na Dokota Beeland nabena. Kabili eico Nacilafwaya ukwisa bamona muno lucelo, emulandu Nacishila kuno.

⁸ Eico, nomba, mulya mwi Buuku lya Bena Korinti, nalimofye chapitala 10, kabili ayakubalilapo ama vesi yane nangu yasano. Natutontonkanye pali ico panshita iinono, pakutila munyinefwe engakwata inshita iyakushimikila.

Nomba natukontamike imitwe yesu, mukubalilapo, mu Kubapo Kwakwe fye.

⁹ Mwebapalwa Taata uwamu Myulu, icine cine nemitima iyakutotela twakontama mukuicefya kuli Imwe pali buno bushiku, uku Mutotela pafintu ifisuma ifya mweo. Kabili ukwishiba ukutila umweo uwine waba fye bulwi bumo ubukalamba, nga tatulebukwata munshila *imo*, tuli muli *imbi*. Lelo ubushiku bumo ubwabukata ubulwi bukapwa, kabili tukamona Yesu Uo tulolela ukumona apo twa Mutememnwa, kabili ukuba abaishibana pamo Nankwe, kabili ukuba ulupwa kuli Ena. Kabili tuli abansansa nganshi pakwishiba ukutila ubushiku bumo tuka Mumona.

¹⁰ Nomba, ileelo, ngafintu twaimiine pesamba lya mu oloko wakale, nga fintu cali, kukukwata icitalaliko, nga fintu Abrahamu aikele palya, alelelela, kabili Lesa naba Malaika babili baishile nokulanda na ena, kabili tuleenekelafye Imwe ukwisa kuli ifwe muno lucelo, kabili landeni ku mitima yesu, ukupitila mu Cebo Cenu, Shikulu, ilyo twakwata isenge ukushinguluka Cena.

¹¹ Paleni umutemwikwa wesu, kakumba umutemwikwa, Shikulu. Twapepa ukutila Mwalamupela amaka nokushipa. Twapepa ukutila Mwalapala ichalichi cinono, naba dikoni nabonse abashingamwa pano, Shikulu, nabonse abesa kuno; tekuno fye kweka, lelo incende shimbi, mu Chalichi Cenu, mwisonde lyonse.

¹² Paleni ababwananyina abatandashi besu abali naifwe mukulongana muno lucelo. Twapepa ukutila Mwalaba pamo nabena nokubasunga. Tweleleni imembu shesu, kabili landeni

kuli ifwe ukupitila mu Cebo Cenu. Twalombela ici mwi Shina lyakwa Kristu. Amen.

¹³ Nga Nshilufyenye Munyina Coats naikala muno muno lucelo. Ena ali...kulya ku kumupepelako, inshita imbi iya bushiku, ku Cipatala ca Babomfi bakale; ipwalonda. Kabili tuli abansansa pakumimona muno, muno lucelo, Munyina na Nkashi Coats.

¹⁴ Nomba, mwi Buuku lya Bena Korinti, cha—chapitala ya 10, ili Buuku lya Bena Korinti lyaba li buuku ilya kulungamikwa. Tulingile ukusenda i Buuku lya Bena Korinti. Cena e chalichi fye ceka mu Cipangano Cipy, ico, mukumoneka, umo intungulushi shakwete ubwafya naco. Lelo, Abena Korinti lyonse bali mubwafya. Paulo, lintu aishile pakati kabo, umo akwete ululimi, kabili umo akwete ilumbo, kabili umo akwete imyumfwile kabili necakumfwaumfwa. Kabili lyonse alekwata ubwafya naba abena Korinti, pakuti bengekala abalungama.

¹⁵ Nga twamona, alefilwa ukufunda abena Korinti ifintu ifyashika. Bali fye mu—mu—nshila yabunya. Bena—bena... Ena tekuti aye kuli bena mushikalamba, ishashika, imbila nga fintu acitile ku Bena Efese kabili ifyo acitile ku Bena Roma, nokubasambilisha ifintu ifyashika, pantu balilililwe ukuisenda. Bena—bena bashintilile nganshi pafyakumfwa umfwa ifinono notuntu utunono nga filya. Ukuba, “Ukuba, Shikulu alumbanishiwe, Nincikwata! Na—Nacikwata u—ubusokololo ubwacisa kuli ine. Nalikwata amalumbo. Ninkwata ubusesemo.”

¹⁶ Kabili Paulo atile, “Fyonse ifi fintu fikafilika.” Mwamona? Cila cimo muli fyena, fyena tefyakucetekela ukucilamo. Kabili eico, lelo, ico ena aleesha ukupela ichalichi, cali ni ilya inanga, uko ifwe—uko inanga twakwatila muli Kristu, uko ukutula ifwe tatwacetekela mufyakumfwa umfwa. Tatwacetekela mubusokololo. Tatwacetekela muli ifi fintu. Eka fye, twacetekela muli Kristu. Nikucicetekelo emo twendela kunse kulya. Ukuba fye...

¹⁷ Tulemona Paulo alesambilisha abena Efese kulya, ifyo ukutula ilyo umufula we sonde taulalengwa, balingilwe kabela ku kupokelelwa kwa bana bakwa Lesa. Nomba, ena... Abena Korinti tabaishibepo nangu cimo palwa ico. Bena fye... balingile ukukwata imyumfwile inono, nangu icintu cimo, akakumfwa umfwa akanono, cimo *ici*, *ico*, kabili *cilya*. Kabili bashintilile pali ico. Tekuti abasambilishe ifintu ifyashika.

¹⁸ Eico, Ndetontonkanya ukutula cisuma nganshi ilyo mwakwata abantu abo mwingasambilisha ifintu ifyashika, kabili Mupashi wa Mushilo kuti apwishishisha ifi fishinka ifikalamba, nokukoba cena mu—mu mitima ya bantu, icakuti beshibe apo beminine, ifyakumfwa umfwa nangu ukwabula ifyakumfwa umfwa, ubusesemo nangu ukwabula ubusesemo, na

conse ico cingaba, na conse ico cingaba. Nga cakutla bona . . . ifwe tatu . . . Nomba ibukisheni, ifwe tatuli . . . Nshileesha ukutla Lesa tabomba ukupitla mu busesemo nefintu ngefyo, lelo ifwe tatushintilala pali ico. Ifwe twalikwata ukwikata ukwashika ukucila ngefyo, mwamona. Pantu, atile, “Konse ukuli ubusesemo, bukafulwa. Uko kuli indimi, shikapwa. Kabili uko kuli . . .”

¹⁹ Nafyonse ifi ifyakumfwa umfwa ifyo balya abena Korinti bakwete, tapali nangu cimo pali fyena icakushininkisha ukutla balipuswike. Tabali nangu umo uwali icishininkisho ukutla balipuswike. Te . . . Nga kuti mwabilikisha, nga kuti mwasesema, nga kuti mwaundapa abalwele, nga kuti mwalandila mundimi, nga kuti mwaailula indimi, nga mwalikwete amano, kabili mwalikwete ukwishiba, tapali icili conse pali ifyo icilepilibula ukutla mwalipusuka; tapali nanngu cimo pali ifyo. Kutu mwakwata conse pali ifyo, Paulo atile, mu Bena Korinti Wacimo 13, nokuluba. “Nshili kantu,” mwamona.

²⁰ Lelo, lintu wakwata ukutemwa, inanga! Muno lucelo, pali ora imo ilyo umukashi talabuka, Nacibuka. Kabili Shikulu acilasokolola kuli ine, icintu cimo icikalamba pafyo Lesa akakilala i Chalichi Cakwe capamo, ukupitla muli ifi ifikakilo fya kutemwa, kabili nefyo cifwile ukuba. Takwaba inshila imbi iyo umuntu engapusukilamo ukwabula ukufyalwa cipya cipya. Lesa ngasuminisha, Ndefwaya ukushimikila pali ico uyu mulungu uleisa. Kabili cilepangikafye mu mutima wandi. Nalimo Shikulu ali nokumpela i Mbila pali cena.

²¹ Nomba, iyi Mbila muno lucelo, ilyo ileisa ku mutima wandi mulya, ni Mbila, ukusokwa. Kabili Natontonkenye ukutla, limbi, nga cakutla ifwe kuti twakwata uku ukusoka ku bantu, nga fintu Paulo alesoka aba abena Korinti. Nga kuti twakwata uku kusoka ku bantu, pakwishiba ukutla tulelolesha pa kupuputulwa nomba, kabili nenshita iyakufwailishapa ilyo tufwile ukubebetwa. Nomba, Paulo atile:

Nakuba, mwe ba bwananyina, Nshilefwaya ukuti mube abakukana ishiba, ifyo ukutla bonse bashifwe bali mwisamba lye kumbi, kabili bonse bapitile muli bamba;

Kabili ba . . . batishiwe kuli Mose mwikumbi na muli bamba;

²² Nomba, ena alebapela ukwiluka ukutla ilyo Lesa aletele Israele ukufuma mu matololo, mumatololo kuku Mubombela, nokubatwala ku mpanga yabulayo, bona . . . Ena naikala nge cilangililo kulya, ukutla, ngefyo ifwe twaletwa mufintu fyonse ifyakumubili, fyonse i—ifyakukonka, nemitande, fyali fimo fine. Kabili twasanga, panshi ukuyako kuntanshi mwisambililo lyesu, icakuti ayengi muli yena yaliposelwe. Pantu, bona kuti bacita fyonse ifyakukonka, kabili amafunde yonse, kabili ifintu fyonse

ifyo Lesa alefwaya, kabili nangu cibe ifyo imitima yabo tayali iyalungama na Lesa.

²³ Nomba, kuti twacita ifintu ifingi. Kuti twalya umulalilo. Kuti twabatishiwa. Kuti twa—kuti twaisa ku chalichi, ukubikwa amashina yesu mwibuuku, nangu ukuba fye nomucinshi nakatina ngefyo twingaba, kabili nalyo line ukuba abaluba. Uku kusoka ukwa katinya. Ifwe kuti twaba fye nga. . . tulesangalala fye ilyo Mupashi walewa, kabili mukulongana uko Icebo caleshimikilwa, kabili imyeo yesu kuti yasangalalafye ne Cebo, kabili nalyo line twaba abaluba.

²⁴ “Imfula ilokela pabalungami na bashalungama.” Imfula imo ine iyo ilenga ingano ukukula, ilenga icani ukukula. Cena cifyalilwa ca cipe, mwamona. Cena cifyalilwa ca ico e cilanda ifyo ifwe twaba. Eico, cifyalilwa icaba muli ifwe, e cilanda ifyo twaba. Mwamona? Te. . .

²⁵ Ifwe kuti twaba bakapepa nganshi mpaka tekuti tupilibule amaboko yesu pa Mulungu, pakucita icintu. Tekuti tubile ifyakufwala fyesu pa Mulungu. Limbi tekuti tucimone icayana ukushita ifyakufwala pa Mulungu. Kabili kuti twaba ababukapepa nganshi kabili aba mucinshi nganshi! Lelo, nomba, nga ifwe mucine tatwafyalwa cipya cipya ku Mupashi wakwa Lesa, ifwe tuleshinshimunafye apa fye.

²⁶ Eico, nomba, cena cintu cakosa nganshi. Kabili tulefwaya mucine ukucisanga nokwishiba Icine. Pantu, ibukisheni, ifwe tatwakakwate ishuko ilya cibili pali ici. Ni ino ine fye inshita imo, eico mulingile ukuba abashininkisha nganshi.

Nomba, moneni, “Nshilefwaya imwe ukukana ishiba, ba munyina.”

²⁷ Nomba, aba abena Korinti, cinshi Nalandile mukubalilapo? Bena baleshintilila isubilo lyabo ilya Muyayaya pafyakumfwa umfwa fimo. Paulo atile, ukuba. . . Kulya, atile, “Ilyo Naisa pakati kenu, umo nakwata *ici*, kabili umo nakwata *ico*. Na umo—umo. . .” Atile, nomba, fyonse. . . Ico nacilungama. Ifwe tatwakwata nangu cimo icakususha ico. Lelo, nangu cibe ifyo, ico teco tulelandapo. Mwamona? Ico teco.

²⁸ Ndeibukisha lintu mukubalilapo Napilibwilwe. Kabili Natampile ukumona ukubomba kwa Mupashi, kabili nefyo bamo balepashanya kucacine, uwine wine u Mupashi wa Mushilo, namunshila imo iyakuti kuti, mulandu nshi, cali icishingacitwafye ukulanda ico icali icalungama ne cilubo, awe nakalya.

²⁹ Kabili Nalimwene umuntu uo Naishibe, kabili Ine, kabili ku kulingulula, Nalishibe ukutila umwaume aleikala no mukashi wa mwaume umbi. Kabili apa aiminine palya alelanda mundimi nokwilula, nefintu fyonse, nokupela imbila. Kabili cena. . . Kabili Nasendele umuntu umbi kucifulo uko Ningalanda nankwe pakashita akanono, na, umo uwacine umwina Kristu.

³⁰ Kabili Natontonkenye ukutla, “Musango nshi ulyo Mupashi, u Mupashi umo wine, uko Ine . . .” Ilyo e lintu namwene intanshi pentecosti. Kabili cali niku Mishawaka, ku Indiana. Kabili Ndemweba, cena mucine . . . Natontonkenye, pa ma ora ayanono ayakubalilapo Nali kulya, Nali pakati ka ba Malaika. Kabili ama ora ayanono ayakonkelepo, Natontonkenye ukutla Nali pakati ka fiwa, ilyo Namwene ico. Namwene aba abaume babili, umo apela imbila, umo ailula.

³¹ Nshatalile umfwapo ukulandila mundimi, nefintu ngefyo, kunuma uku. Namwene ilye mipashi, ifyo yaendele. Natontonkenye ukutla, “Oh, owe! Mulandu nshi, Imyaka ikana limo iikalamba yalitampa.” Kabili nomba lintu Nakwete inshita, kunse, ukulanda kuli umo pali bena kabili nokulanda ico apangilweko, kwali umo uwabipisha nga fintu engaba.

³² Kabili—kabili bulya ubushiku Nabatambile nakabili, kabili Natontonkenye ukutla, “Oh, kantalukepo pano. Tekuti njiluke ifyo ici cili.” Kabili Namwene ukutla filye fintu fyali muli Baibele. Lelo pano pali umo uwalecita ico, uushakwete u Mupashi wakwa Lesa; naumbi alecita ico, kabili alikwete u Mupashi wakwa Lesa. Nomba Nali uwafulunganishiwa onse. Kabili Nalekele icintu conse ukuya.

³³ Kabili imyaka kuntanshi, ilyo ilyeshi lyapwile, Naleya, ndeenda mumusebo uwakuya ku Green’s Mill, Mista Isler, cilolo wa buteko, aishile kuno ku chalichi, alinkumenye mumusebo, kabili abikile amaboko yakwe pali ine, atile, “Billy, cinshi ico Kristu apilibula kuli iwe nomba?” Batata baliile. Munyinane alifwile. Kabili umukashi wandi aliile. Umwana wandi aliile. Kabili Ine . . .

Atile, “Cinshi ico Alepilibula?”

³⁴ Natile, “Mista Isler, Alapilibula ukucila pa mweo kuli ine.” Natile, “Icintu cimo calicitike mukati kandi. Imyaka inono iyapitapo, Kristu aishile mu mutima wandi. Kabili Ine—Ine . . . Cena cacila pafyo Naba palwandi. Cena cintu fye cimo icacitike. Tepamulandu wakutla Nali uwa bukapepa. Teifyo. Caba fye icintu cimo ico Lesa, ukupitla mukusenamina, ancitile.” Kabili Natile, “Nangula kuti Anjipaya, Ine kuti Na Mucetekela cimo cine fye. Kabili nga Nali kumbo, kabili kwaliko icintu ica musango ifi ngo kutemwa, kumbo, Ine nalyo line kuti na Mutemwa.” Epela fye. Cena cintu cimo *muno*. Ena ali uwalungama. Nalilinga ukukandwa konse uko Natala kwatapo. Mucite cimo cine. Lelo nga cakuti inanga, cilya Icintu cimo, ilya inanga iyakutemwa kwa kwa Lesa, iyo iyaikatilila mu mutima wa muntu, ifintu fimbi fisa mukuba ifya cibili.

³⁵ Naikela pa mulando kulya, Nalepepela pa cintu cimbi. Kabili Baibele yandi yaliswike, kabili Nalebelenga mu . . . mulya mwi Buuku Iya Ba Hebere, chapitala 6. Kabili Nalebelenga palya, ifyo ukutla, “Tacingacitwa kuli abo abaishiba kale, kabili

baba abakumako ku Mupashi wa Mushilo, pakumona ukuti bafumako, ukuilenga abapya abene nakabili kukulapila. Pantu imfula ilingi ilokela pe sonde, ukulitapilisha, ukulifwika, pantu lyena lyalipekanishiwa. Lelo ico icaba mupepi nokukanwa, imyunga na bacilasa, ico icaba mupepi nokukanwa, cifwile ukocewa.”

³⁶ Kabili Mupashi wa Mushilo atwalilile ukulanda kuli ine palwa ico. “Cinshi ico?” Kuti nabelenga ico nakabili. Kabili nombamba icimonwa calishile. Kabili Nalimwene isonde naliminina kuntanshi yandi, lilepilibuka. Nalilimwa, kabili kwati ukutipwa nokupekanishiwa ukubyalwa. Kabili kwaile umuntu, mu cabuta, alebyala imbuto. Kabili panuma yakushinguluka apashokela isonde, umuntu umbi alishile, mucafita, alebyala imbuto kunuma yakwe. Kabili ilyo imbuto isho umuntu umusuma abyele, shatumbile, shali ni ngano. Kabili umubifi, umuntu wafita alibyele, imbuto shalitumbile, kabili, afwele icafita, shamenene, kabili shali fyani. Kabili, oh, umo ali uwapusanako ku munankwe.

³⁷ Kabili icilala icikalamba caishile, mucimonwa. Kabili aka ngano akanono kakontamike umutwe wakako; kali fye necilaka nganshi icakunwa. Kabili i—icani cakontamike umutwe waciko; cali necilaka cakunwa. Elyo ikumbi ilikalamba lyalishile, kabili imfula yalishile. Kabili ingano inono yalimine nokutendeka ukubilikisha ukutula, “Shikulu Alumbanishiwe! Shikulu Alumbanishiwe!” Yali iyansansa pakukwata amenshi. Kabili akacani akanono kaliimine, katendeka ukubilikisha ukutula, “Shikulu Alumbanishiwe! Shikulu Alumbanishiwe!” pa menshi yamo yene.

³⁸ Nombamba Nalikutuluka. Mwamona? Ico cili apa. Umupashi wa Mushilo ukawa, lelo, “Kufisabo fyabo, bakeshibikwa,” efyo Shikulu Yesu asosele. Mwamona? Mwamona? Tepakucita kwa Mupashi, nangu baposhe abalwele, nangu balandile mundimi, nangu bembile mu Mupashi, nangu basangalale muli *uyu* musango nangu *uyo*. Kuti bacita fyonse ifyo kabili baba fye abaluba. Mweo obe mukati kobe, icakupitamo icakufyalwa cipya cipya.

³⁹ Nombamba, Paulo aleesha ukuleta ici kuli balya Abena Korinti. “Ine...”

*Nakuba, mwebabwananyina, Ine nga...
nshingafwaya imwe ukukana ishiba, ifyo ukutula...
bashifwe bonse bali mwisamba lye kumbi, kabili...
bapitile muli bemba;*

Kabili bali... babatishiwe kuli Mose...

⁴⁰ Bonse muli bena balingile mumatololo. Yesu atile, “Te bonse abatila, ‘Shikulu, Shikulu,’ bakengilamo. Lelo uyo ucito bufwayo bwakwa Taata uwaba mu Muulu.” Teico ico iwe

ulelanda. Kuti washimikila i Mbila nsuma kabili nokuba uwaluba. Icine cine.

⁴¹ Ifi tefintu fyabaice fye. Ici mukupwililika... Calishika. Kabili ubwina Kristu tabwabafye ubunono, ulubuuto, icintu icisuma, kwati, “Ukuba, nalaya kulya ku chalichi, kabili Nalishiba ukutula wena mulimo wandi ukuya.” Ubo tebwina Kristu. Munyina, ubwina Kristu tabwaba...

⁴² Cena cintu cimo ico Lesa acita. Lesa ali musala, muli Kristu, kabili amupela nge cabupe ca citemwiko, kuli Kristu. Kabili nga... Ubwite bakwa Lesa, ukusala! Kabili nga ifwe twakwata ishuko ilya kuba umuntu wa musango ngoyo, nokukukana, pafintu ifya mwisonde? Nomba umfweni ilyo tuletwalilila.

Kabili bonse ba lilile uyo manna umo wine uwaku mupashi;

⁴³ Bushe namumfwa ico? Vesi ya 3.

Kabili bonse ba lile manna umo wine uwaku mupashi;

⁴⁴ Cinshi ico alelandapo? Ifyakukonka ifya muchalichi. Abantu balesa ku chalichi nokutula balilapila, kabili balibatishiwa kuli Kristu, ukusenda i Shina lyakwa Shikulu Yesu. “Kabili bacitile ico mu matololo, nabo,” Paulo efyo alandile. Ico eco abena Korinti bacitile. Bena baishile nokubatishiwa kuli Kristu. Bafwele Kristu, kunse. Mukubomba balimubulile. Mumano bali Mupokelele.

⁴⁵ Lelo, munyina, cena calicilapo paba mano. Calicilapo apo. Ciya ku—kukufyalwa ukwacine, tetontonkanyo fye ilyakumano nangu ukubomba kwafyakumfwa umfwa. Lelo, Ukufyalwa, icakupitamo, icintu cimo ico ciya mukati ka mutima nokupilibula mukati ka buntu bwa mukati, ico cilenga iwe ukucita ifintu ifyo nga tawacitile, amashiwi yambi. Cikulenga ukutemwa abo abashingatemwikwa. Cilamulenga imwe ukucita ifintu ifyaibela ukucila ifyo mwatalile ukutontonkanya ukutula kuti mwacita.

⁴⁶ Kabili ifintu nga fyaima, yena ninanga yenu. Imwe tamulingile ukutontonkanya ukutula, “Bushe Ndi nokucita ico?” Oh, iyo. Cena tacaba nga Ndi nokucita. Cena capangilwa ine. Kristu muli ine, alipanga ico, Umwine eka, kabili Nacetekela fye munanga yakwe yeka. We cintu ukuwama we!

⁴⁷ Moneni, bonse balilile umulalilo. Ulubuuto ulwali mu... Twalishiba ukutula ici cali cakucitika icacifyalilwa, pantu twali utunono utwapala imfula yabuta utwaleloka ukufuma ku Muulu, kwati tumukate twanaka nobuci pali twena. Kena... Akamukate kali fye akanono kwati ka bishketi, ka bishiketi akanono, kabili kalikwete ubuci pa mulu wakako. Kabili bonse bali abakumako kuli ico. Bonse bapitile muli Bemba Wakashika, kabili balibatishiwe ukupitila mwi Kumbi kabili ukupitila muli bemba, kuli Mose. Balekonka amafunde yakwe, ngo mubomfi

wakwa Lesa, bonse babatishiwe kuli ena. Bonse bali bakakonka, ngefyo twaba ileelo, abatungululwa na Mupashi wa Mushilo, Kasambilisha umukalamba uwa Chalichi ca bena Kristu. Batutungulula ukupita, ukuya kulubatisho lwa mumenshi.

Kabili atile, “Bonse balile manna imo ine.” I . . .

⁴⁸ Ni cinshi ico yacitile? Ilya manna yawilile Kora nebumba lyakwe, umusango fye umo wine ngefyo yacitile kuli Mose, Kaleb, na Yohana. Bonse bali abasankanishiwa capamo, bonse abakumako ku lubatisho, bonse abakumako kuli bu membala, bonse abakumako ku kulumbula, kabili, nomba, bonse abakumako ku mulalilo.

⁴⁹ Namumfwa ico? Lolesheni kuli kulyo kusoka ukwakukana seka. Kabili, mwebantu ba mwi hema, mucumfwikishe ico mukushika. Ibukisheni, cena cifulo cenu ica Muyayaya, calikala apo pene. Mwicipitafye kwati mashiwi yafye fye nangu icintu cimo. Ici cintu ico tufwile twafikako. Cena cintu cimo ico cilepilibula nga cakutula tukekala panuma yabuno bwikashi nangu iyo.

⁵⁰ Bonse babatishiwe kuli Mose, ukupitila muli Bemba wa Kashika. Bonse bakonkele cilye Cibumbwa cimo cine ica Mupashi, Ikumbi kabili ne Ntumba ya Mulilo. Bonse ba tungulwilwe na Malaika umo wine. Bonse bafumine kuli kakumba umo wine. Bonse balibatishiwe muli bemba. Bonse balile kuli ulya manna uwa bumupashi. Kabili ulya manna aali ni Kristu. Kristu ukulaika, manna yalepona cila bushiku ukufuma ku Muulu, no konaulwa kuno, ku kusunga abantu mu bulendo bwabo.

⁵¹ Kabili Kristu aishile ukufuma ku Muulu nokupela umweo Wakwe, ukutula, “Uyo onse uwacetekela muli Ena ekonika lelo akwate u Mweo wa muyayaya.” Kristu aishileika nokwisaba manna yesu, kukulya kuli aya amapalo yamo yene aya bumupashi.

⁵² Eico nomba, Mupashi wa Mushilo kuti wawila mukati ka bantu, kabili bonse babili abena Kristu naba cifulefule, kabili abacetekela citika na bacetekela aba pa mupaka bonse bali nokulya cimo cine. Lelo ico nangu cibe fyo tacipilibula. Oh, Ndekabila nga Nalikwete amashiwi, ayo Ningatwalamo ici nokucingisha mumutima wamuntu onse muno. Kabili moneni ifyo caba ici icintu icashika. Cena te cintu cimo icakwangalilako. Cena tekuya fye ku chalichi.

⁵³ Nomba, kutikeni. Bonse balile manna umo wine uwa kumupashi. Tontonkanyeni pali ico, manna uwa kumupashi!

⁵⁴ “Oh,” mwatila, “Nalishiba ukutula Nalipusuka. Alleluya! Nalibilikisha mu Mupashi. Ndeumfwa *ifi*.” Cilya tacakwatapo nangu cimo ica kucita na cena. Mulemona ifyo tushintilishisha icifulo cesu ica Muyayaya pa fya kumfwa umfwa? Bushe mulemona, muli buno bushiku ubo tuleikalamo nomba,

ifyo ababantu baleiminika iyabo—iyabo incende yakuyako pacakumfwa icinono? “Oh,” mwatila, “Nalishiba ukutula Nali Cikwata, pantu Na—Nacumfwa Amaka yapita muli ine. Nacicita *ici*.” Ico kuti caba fye icishinka nganshi, kabili ucili waliluba.

⁵⁵ Oh, ngacakutula twacikwatafye akashita akanono. Natupilibule ku bena Korinti Wacimo 13, apa, pakashita fye akanono, kabili kutikeni ifyo Paulo akwete ukulanda palwa ico, apa pene.

Nangula Ningalandila mu...ndimi sha bantu kabili...ba malaika, kabili nshakwata ukutemwa (ico caba ukutemwa), Naba fye nga ukulila kwa mukuba, na mu ciunda cambelu.

...nangu Ine Nalikwata icabupe ca busesemo, kabili noku kutuluka fyonse i fyankama, kabili no kwishiba konse u kwishiba; kabili nangu Ningakwata icicetekelo conse, icakutula kuti Na sesha impili, kabili nshakwata ukutemwa, Nshili nangu cimo.

⁵⁶ Umfweni ku mukali umukote umutumwa acingisha muli ici chalichi cali nefyakumfwa umfwa, abo abaleshintilila isubilo lyabo pa fyakumfwa umfwa. Nomba, lino li sukulu lyapa Mulungu. Ino nincende ya kulungamikwa. Iyi nincende yakufunda. Kabili akalanda kumuntu uwingeminina mucintamba nokulufya. Munyina, yena ninshita iyo ifwe twapanga Amalembu ukupashanya na Malembu. Ico nacilungama.

Kabili nangula Ningapela ifipe fyandi fyonse ku kulisha ababusu...nangula Ningapela umubili wandi kukocewa, kabili nshikwete ukutemwa, ta cile nonsha icintu nangu cimo.

⁵⁷ Mwamona, imilimo yenu yonse iisuma, imicitile yenu yonse iisuma, ifintu fyonse ifya bumupashi ifyo mwakwata, ifyabupe fyonse ifyo mwakwata, fyonse ifyakumfwa umfwa ifyo mwakwata, ukusangalala konse kuntu mukwata, umutende onse untu mwakwata, tacikwete nelyo cimo icakucita naco, icakubalilapo. [Tapali mashiwi pali tepu—Kale.]

⁵⁸ Tontontkanyeni pali ico, pakashita fye. Kabili tontontkanyeni pama chalichi ileelo, ama chalichi yesu ayakalamba, Presbyteriani, Methodisti, Baptisti, ne filonganino, bena batontontkanya pantu batila, “Nincetekela,” isa mukati, babika ishina lyabo pe buuku, ico cacipwisha. Efyo baba ukutali!

⁵⁹ Abantu besu ba Pentecosti batontontkanya ukutula, ukuba, pantu balikwata ifyakumfwa umfwa ifinono, baumfwile bwino, balandile mu ndimi, balikwata umulopa unono mu maboko yabo, amafuta ayanono pa cinso cabo, nangu icintu cimo, “Natucikwata cena.” Oh, ba mailoshi ba millioni ikumi! Namucumfwa ici? Moneni ifyo ciwa nga lesa uwa ili sonde,

napofwisha amenso ya balya, kabili bena batwalililafye ukwikala ngefyo. Kutikeni.

Pantu nangula Ningapela ifipe fyandi fyonse kukulisha ababusu, kabili nangu Ningapela umubili wandi...ukocewa, kabili nshakwata ukutemwa,...
Nshili nangu cimo.

⁶⁰ Lolesheni pali fyonse ifyo ifyabupe, pali fyonse filya ifintu ifisuma. “Ine ndalisha umubusu. Ine nalikwata umutima uusuma muli ine. Ndacita *ici*. Ndacita *ico*. Ndaya ku chalichi. Ndalandila mundimi. Ndasesema. Ndondapa abalwele. Ndashimikila i Mbila nsuma. Ndacita ifi fintu.” Paulo atile, “Nalyo line, Nshili kantu.” Fyonse ifyo fintu kuti fyapashanishiwa muli bumubili. Nomba cinshi ico ena alanda?

Ukutemwa kulashipikisha...kwalikwata uluse; ukutemwa takukumbwa; ukutemwa takuimya ukwine,...takwaitumika,

Ta kucita ifintu munshila iyabipa, munshila iyalubana...(Tontonkanyenifye!) takufulwa bwangu, takutontonkanya ifyabipa;

⁶¹ Ukutemwa, ukutemwa. Ukutemwa ni cinshi? Ni Lesa. Musango nshi Lesa eshilamo kuli imwe? Ku Kufyalwa. Mwamona?

⁶² Nomba, bonse babatishiwe kuli Mose. Bonse balile umulalilo. Bonse balile manna umo wine uwa kumupashi uyo uwafumine kuli Lesa. Cila umo pali bena alile icintu cimo cine.

⁶³ Kabili, ileelo, natwiminina ukushinguluka nokumfwa i Cebo, nokusansamuka palwa Cena, nokusenda Manna noku Ilya, nokutila, “Oh, alleluya! Ico cisuma. Oh, Ndetasha Ico. Ee, Nabatishiwe muchalichi. Nda—Ndabula nokupanga ukulumbula kwandi. Ndabika ishina lyandi mwibuuku. Ndi membala wacipani.” Fyonse filya fili ifya fye umupwilapo apa fye nga takuli icintu cimo ico Lesa acita. Nga cena cili... Ifyo e fintu ifyo mwacitile. Ifyo e fintu ifyo icitetekelo cenu caletele.

⁶⁴ Lelo, kano fye Lesa acita icintu cimo kuli iwe, ku Kufyalwa kupya! Pakashita fye nomba. Nomba vesi ya 4.

Kabili bonse banwene Icilibwe cimo cine ica kumupashi: pantu balenwa kuli cilya i Cilibwe cakumupashi ico calebakonka: kabili ico Cilibwe cali ni Kristu.

⁶⁵ Bonse banwine ukufuma ku kafukauka, balisekelele. Nomba ico cinshi cilepilibula? Ingano nefyani fyonse fibili fyalesangalala pakupokelela ayo amenshi yakumupashi. Tulaya kuchalichi. Tulatota indupi shesu nabonse abashala. [Munyina Branham atota indupi shakwe—Kale.] Tulapunda pamo nabonse abashala. Tulatoloka pamuulu na pesamba

pamo nabonse abashala. Tulalumbanya Lesa pamo nabonse abashala. Tulasesema nabonse abashala. Tulalandila mundimi nga bonse abashala. Tulapepela abalwele nga bonse abashala. Lelo atile. . . Nomba kutikeni, ilyo tuleya pantanshiko panono.

⁶⁶ Nomba i. . . ndefwaya ukwiminina pali miniti, oh, pali, “cilya Cilibwe cali ni Kristu.” I Cilibwe cali ni Kristu. Cena cali mumibele iituntulu, nga fintu cili mumibele yaku mupashi ileelo. Manna, Icakulya, ico caba i Cebo ico caishile ukufuma kuli Lesa ukufuma ku Muulu, Kristu e Cebo cakwa Lesa, kabili tulalya i Cebo. Mwamona? Tulekala, kwati nimu Mbila ya muno lucelo, tulekutika. Imyeo yesu ilasansama nokwikata ico Cebo. Twikalila ku Cebo. Atile, “Bonse baliile ulya Manna umo wine uwa kumupashi, kabili bonse balinwine, bonse banwine ukufuma kuli cilya i Cilibwe cimo cine icakumupashi, na cilya Cilibwe cali ni Kristu.” Tontonkanyeni pali ico.

⁶⁷ Nomba ni cinshi ico ali nokucita? Cibikeni pampela apa. Ena alesoka balya Abena Korinti ukutila, “Beni abacenjela kufyo mulecita. Lintu Naisa pakati kenu, umo nakwata amalumbo, umo nakwata indimi, umo nakwata *ici*, kabili umo nakwata *ico*, umo nakwata ubusesemo, umo nakwata ubusokololo, umo alecita *ici*, kabili umo alecita *ico*.” Beni abacenjela. Mwishintilisha icitetekelo cenu pali ico. Ifyo fintu fili fye bwino, bena balikwata icifulo cabo, namu chalichi, lelo mwikesha ukubika ipusukilo lyenu pali ico. Ngo mweo wenu taulelingana ne Cebo cakwa Lesa, lyena ninshita iyakuba uwalungama na Lesa.

⁶⁸ Moneni, nomba, kabili, *ici* Cilibwe, *ici* Cilibwe cali Cilibwe icali mu matololo.

⁶⁹ Kabili Ndefwaya mumone, ilyo Lesa aitile Mose, nokumutwala mu Egypto mukupususha abana ba Israele ukufuma mwisamba lyekoli lyakwa Farao, Atile, “Cinshi ico mukuboko kobe?”

Kabili atile, “Ninkonto.”

⁷⁰ Kabili abulile cilya cimuti nokuciposa panshi, kabili caishileba insoka, kabili ena, Mose alifulumwike, elyo aciimishwe, kabili casangwike inkonto muminwe yakwe.

⁷¹ Kabili ilya inkonto, lintu aingile mu Egypto, aiambalike mulya mu Egypto, na balunshi baishile. Asontele cena, ne finkunka fyawile. Cena cali bupingushi bwakwa Lesa. Ubupingushi bwakwa Lesa bwali mukutambika kwa nkonto.

⁷² Kabili nomba, moneni, ilyo ilya nkonto icine cine tailaikatwa. Mose abikile ukuboko kwakwe pacifuba cakwe, kwaishileba ifibashi.

⁷³ Nga fintu umuntu onse aba, mukubalilapo, umubembu ukupitila mucifyalilwa, takwaba inshila imbi iyakushingulululamo ico, imwe mwafyalilwa mulubembu,

mwapangilwe mumampulu, mwaishile pesonde mulelanda ubufi. Limbi walibikilwe pa cipailo ca chalichi caba nyinenwe, imwe limbi walisanshilwe, nalimo wali *ici, ico*, lelo uli mubembo pakutampilako.

⁷⁴ Nomba, kuli nacimbi. Lesa atile, “Bwekesha ukuboko kobe mu cifuba cobe.” Pa mutima wakwe, ena abikile indupi shakwe nakabili, pabutungulushi bwakwa Lesa, uko ifwe twafumishiwe. Intanshi, ukuboko kwakwe kuli ifibashi. Iwe waletelwe na Lesa, intanshi, umubembu; tekupitila mukusala, lelo ukupitila mucifyalilwa; elo wabwelelamo nakabili. Kabili ilyo afumishemo, ukuboko kwali ukwasanguluka kabili ukwapwilika, ukulangisha ukutila uku kuboko, ilyo takulapepesha inkonto yabupingushi, kwali nokusangululwa, ilyo takulapepesha. Kabili kapyunga uuli onse, kasambilisha uuli onse. . .

⁷⁵ Nacumfwa icintu cimo muno lucelo ico icine cine icacikatanya umulopa wandi, lintu Nacasha icilimba candi, ilyo fye nshilaisa. Tekukana pela umucinshi; kabili nga kuliko umo muno, uwalupwa ku muntu, Nshilepilibula ukumulengo kumfwo bubi. Lelo yena ninshita. . . Kabili Lesa ngafwilisheni ukutila lyonse ningababa umwina Kristu uwalinga ukubika, ukupanga icafita ukuba icafita, kabili icabuta, ukuba icabuta, ukuba uwacishinka.

⁷⁶ Naumfwile umuntu umo aleimba, kabili atile, “Ninkwata icipangano candi.” Kabili apilibwile nokubelenga Amalembu, nokushimikila ukufuma mu Malumbo ya cimo, “Alipalwa umuntu uushikala pacipuna cabakapumya, uwenda munshila yababembu.” Namwishiba ifyo ena aali? Ulyo mwaume uwakushana kuntanshi nakunuma, Jimmy Osborne pa cilimba, aleshimikila i Mbila nsuma.

⁷⁷ Oh, munyina, nga kwalitala akubako icamusebanya! Umuntu uwaba ngefyo takwata umulimo uwakuya mu Cebo cakwa Lesa wa mweo. Kabili nga mwamona uyu mulumendo uwa kushana kwa Renfro Valley Barn Dance, aaliceseshe ubushiku bonse aleshanya, aletota namaboko yakwe, kabili aletwalilila mukushana. Kabili ulucelo lwakonkapo, acinjishe ishiwi lyakwe nokulanda ngo mwina Kristu. Kabili, mulandu nshi, kukowela nefiko mucinso cakwa Lesa.

⁷⁸ Ukuboko ukwapepesha iyi Nkoto yabupingushi ifwile yasangululwa na Maka nokubuka kwakwa Kristu. Ena takwata umulimo wakwikata i Cebo cakwa Lesa. Na bakashimikila abengi balesha ukumulandilako uyu Elvis Presley, ico icishaba nangu cimo mwi sonde lelo ni Yuda Iscarioti mupya. Yuda Iscarioti akwete amakumi yatatu aya silfere; Elvis Presley akwete ama millions yama dolla kabili no mwina waba Kadillaki. Lelo, ena aliishitishe. Ena aali uwacetekela umwina Pentecosti, kabili ashitishe ububeli bwakwe nokuba kashana

wakuya kuntanshi na kunuma, kabili aliputwamo na ciwa. Kabili Nshile landa ifibi palwa ico. Iyo, mukwai. Kabili ni Yuda Iscarioti mupya.

⁷⁹ Kabili, lyena, nangula bakapyunga baleesha ukukula icintu caba ngefyo. Kabili Elvis Presley aletila, “Ee, Naceetekela Lesa pakutunguluka kwandi konse.” Kuti uwamweo, uwamushilo Lesa apela shani ukutunguluka kumusalula neciwa, icintu icangulu?

⁸⁰ Ico caliba icakucinga icakulishapo ico cino calo catala monapo mwaume nga Elvis Presley uwatuma imyeo ku mbo, ku yakwe iyakale iyafiko, ifintu ifyakowela ifyakushana ukuya kuntanshi nakunuma. Mucine. Nshikwete ukulomba ubwelelo nangu bumo, nakalya. Nga kuti mwancetekela ine ukuba kasesema wakwa Lesa, ibukisheni, kwaliba ciwa uwaifungusha mu mubili. Mucine.

⁸¹ Kabili Jimmy Osborne na bonse tabakwata umulimo ne Cebo cakwa Lesa. Kabili nangula umuntu uuli onse uyo uusenda ishina lyakwa Lesa apa fye, mukuipantawila nokushana nokuya kuntanshi nakunuma nefintu ifyabipa ngefyo, ukwisa ku cintamba icili conse nokweshia ukusenda i Cebo cakwa Lesa.

⁸² Ubo e bwaba ubwafya na machalichi ayengi ileelo, epo musanga utunono utwakale utuma boogie woggie ukufuma muncende muno. Umukashana umunono uwakale uyo uleshana nokucita fyonse ifi kuno ukushana kwakuya kuntanshi nakunuma, inshita imo iyabushiku; kabili aisa kucipailo, kabili ubushiku bwakonkapo mwamumona aleimba ulwimbo ulwaibela. Bamo imwe mwebantu mulabula bakalisha bacilimba ukufuma muncende kulya kucikulwa camangalo yamubushiku, nokumubika mucintamba, ukushimikila, mumilungu ibili.

⁸³ Munyina, Ndekweba, ena tekuti acite ico pano. Iyo, mucine. Ena alingile ukubelenga, ukushininkisha umwine ukuba umuntu wakwa Lesa, nokufwailisha. Tatwacetekela muli uku ukutoloka kwabushiku bumo ukwaba ngefi. Ico ecabika ichalichi mumibele cilimo ileelo.

⁸⁴ Tulekabila Icine. Ici Cebo e Cine. Ico nacilungama. Ukuboko ukwapepesha iyi Nkonto yabupingushi kufwile kwaba ukwasangulula. Mukupwililika.

⁸⁵ Kulya ukuboko kwa bupingushi ukwakwa Mose kwalisangulwilwe, kabili nomba inkonto yabikilwe muli kwena. Kabili inkonto yaikile no uleta ubupingushi pali Israele.

⁸⁶ Kabili nomba mumatololo, cilya icipasho icisuma. Kabili Ningile ukwisala. Ici cipasho icisuma, ica nshita kwali Icilibwe, “kabili cilya Cilibwe cali ni Kristu.”

⁸⁷ Kabili abantu abaleonaika balefwa, pa mulandu wa menshi, kabili calibalingile. Balefwaikwa ukufwa

pantu baleiwing'wing'insha. Baliilishenye. Bena tabali abacetekela, pa kutendeka. Tabali cintu lelofye abacetekela abakumano. Bena... I—icakupapusha calicitilwe, kabili ibumba ilyasankanishiwa lyalifumine. Bena tabapilibwilwe ukufuma mu mitima yabo.

⁸⁸ Kwalifye batatu mwibumba, abo twaishibapo; Mose, Aaroni, na Kalebu, Miriamu.

⁸⁹ Kabili Mirriamu alangishe ubucenjeshi bwakwe, pamo, lintu asekele, pantu Mose aupile uyu umukashana Uwafita. Kabili atile, “Bushe takwali abakashana bambi abakupa, nafimbipo? Ena kuti acita ico.” Kabili Lesa tatemenwe palwa ico, kabili amupumine nefibashi.

⁹⁰ Kabili munyina wakwe wine abilikishe, atile, “Bushe kuti waleka nkashi yobe ukufwa muli uyu musango?”

⁹¹ Kabili Lesa aebele Mose ukwisa ku cinso Cakwe. Kabili aile nokupapatilako—nokupapatilako Miriamu. Tali nomweo inshita iitali panuma yaico.

⁹² Iyo, munyina. Ico Lesa acita caliba icapwililika. Tatwakwata ifyo twingacita, namano yesu, ukubikako icintu icili conse kuli Cena. Cilekenifye Cena mumusango Cabelamo. Lesa alicitile ico; Lesa ali Cilanda; ico e cicipwishisha. Cisendeni fye. Nshishibe ifyo cena... Nga kuti Nacilondolola, lyena ninshi kuti Nalingana na Lesa. Tekuti nondolole Ico. Nacetekela fye Ico. Epelafye. Ico eco Ine banjipusha ukucita. Tapaba nangu uo baipusha ukulondolola ico, pantu cena calicilapo pamano yesu, cena calicilapo pamano yesu. Ni Lesa Eucita ico, eico cena tekuti cilondololwe. Ine kucipokelelafye, ukupitila mukucetekela, nokutila, “Cena cipe candi ica mubumfisolo, kabili Nalicetekela ico.” Ine tekuti ncilondolole.

⁹³ Ifyo ici cilibweabela palya! Lesa alikwete ilibwe, ilyakwetemo amenshi, ilibwe fye ilinono limbi talyakulile ukucila idesiki ilyo. Lelo ilyo Mose aumine ili libwe, mwali amenshi ayalinga ayaishile fuma muli yena ukunwisha abantu ba milioni babili. Kabili teico fye ceka, lelo ne ng'ombe ishingi nempaanga nefintu ifyo bakwete.

⁹⁴ Oh, ilyo Namona bamo aba bakapenta abapenta ifikope, akalitoni akanono—akanono kalepona ukufuma mu cilibwe, kabili nomwana umunono naiminina palya ne—ne mbeketi inono mukuboko kwakwe! Oh, yena tayalefuma ngefyo.

⁹⁵ Yalefuma yalefukumuka yalefufumuka. Yalinwinshishe abantu ukucila pali ba milioni babili, ukubikapofye nengamali nenama shabo shonse. “Kabili cilya i Cilibwe cali ni Kristu Yesu.” Icalingana bwino na Yohane 3:16. “Lesa atemenwe isonde, icakutila Apele u Mwana Wakwe umo uwatemwikwa, ukutila uyo onse uwacetekela muli Ena ekonaika, lelo akwate u Mweo wa Muyayaya.”

⁹⁶ Kabili moneni icacitike. Inshila fye imo iyo bena bengafumishamo yalya amenshi ukufuma muli cilya cilibwe, kutila inkonto ya bupingushi yali nokuma icilibwe. Kabili Mose aumine icilibwe, kabili ubupingushi bwakwa Lesa bwapumine pa Cilibwe. Kabili ilyo yacitile ifyo, yaletele amenshi yaciko.

⁹⁷ Abantu bali mucine cine . . . Lesa ali fye, mukubaleka ukuti bafwe, pantu taba Mucetekele, bali, ababula umucinshi, bali nibacisanguka, tabalekabilwa ukuba no mweo, na Mose abetile “bacintala,” abatalamine Lesa, kabili balekabilwa ukufwa.

⁹⁸ Kabili ifwe bonse tulekabilwa ukufwa pantu twalitalamina Lesa. Abasalwa . . . Moneni, ifwe bonse twalefwaikwa ukufwa. Lelo, Lesa waluse nganshi! Ena talingile ukutontonkanya pali ifwe. Lelo, Ena aba uwaluse nganshi, mpaka Asendele imembu isha cila umo muli ifwe, nokubika pa Mwana Wakwe Umwine uwatemwikwa, Kristu; ukuti twingakana ukonaika, lelo ukuti twingakwata u Mweo wa Muyayaya. Kuti twanwa shani ku Cilibwe, kabili nombamba twakana ukulungama mumutima wesu?

⁹⁹ Lelo, munyina, baba muma milioni, muno lucelo, abalecicita. Ico nacilungama nganshi. Abacetekele pantu ni ba Baptisti, nangu ba Methodisti, nangu ba Pentecosti. Nabacetekela pantu balikwatako imyumfwile imo iishaishibikwa bwino, pantu balilandile mundimi, pantu balipundile, pantu balishanane, pantu balikwete umusonkano wakundapa kabili na Lesa alyundepe abalwele, nangu icintu cimo ico bacetekelepo, pantu balikwete ubusokololo (cena cali icishinka,) pantu balicitile *ici*. Ifyo fintu filifye bwino, tapali nangu cimo icakulanda ukubasusha, lelo ico tacikwete nangu cimo icakucita nepusukilo lyobe, tapali icintu nangu cimo. Kuti mwaitila amafuta ukufuma mu maboko yenu mpaka yapongoloka ukufika galloni, nangu umulopa ukufuma pamenso yenu, kabili nalyo line tacilepilibula nangu cimo. Ico nacilungama.

¹⁰⁰ Paulo atile, “Kuti nalandila mundimi nga bantu naba Malaika, kabili nalyo line naba uwaluba.” Nangula Ningakwata amano nokwishiba, nokwiminina nokulondolola iyo Baibele, uku Cipangafye ukumoneka, uku Cikaka pamo, ico nalyo line tacikwetepo icakucita na cena.

¹⁰¹ Munyina, bonse banwine ukufuma ku Cilibwe cimo cine. “Ico Cilibwe cali ni Kristu.”

¹⁰² Ubupingushi bwali pali Kristu, pakutula mwingaba abashuka ukwisa nokunwa. Bwena busuma bwakwa Lesa kuli imwe, ubo mwisa mukunwa. Cena busuma bwakwa Lesa kuli imwe, ubo mulya ukufuma mu Cebo. Ubusuma bwakwa Lesa kuli imwe, ukutula Ena amusuminishe ukubatishiwa. Ubusuma bwakwa Lesa kuli imwe, ukumulenga ukuba abekashi, ukumupela ubumi busuma, ukumubika mu chalichi

muno lucelo. Bwena busuma bwakwa Lesa. Ubo bonse busuma bwakwa Lesa.

¹⁰³ Lelo nga palwa busuma bwenu ukubwelela kuli Lesa? Bushe mulefwaya ukupela ifintu fyonse, itontonkanyo lyonse, imicitile yonse, ifintu fyonse kuli Ena? Ico eco—ico eco Lesa amucitila. Cinshi ico imwe muli noku Mucitila?

¹⁰⁴ Moneni, lekenifye tubelenge ama vesi nayambi. Kabili Na—Nalaisala, pakutila kakumba engafika ku cebo cakwe. Nomba lolesheni. “Kabili Icilibwe cimo cine cali ni Kristu.” Nomba vesi ya 5.

Lelo nabengi abamuli bena Lesa ta... temenwe...

¹⁰⁵ Mwamona? Abasuminishe ukubatishiwa. Abasuminishe ukulya i Cebo noku Cicetekela. Abasuminishe ukupokelela amapalo ya kumupashi. Abasuminishe ukunwa ukufuma ku Cilibwe ca kumupashi. Fyonse ifyo Lesa acitile, ku kusenamina Kwakwe, lelo, nomba, Lesa tali uwasekelamo nabena. Moneni.

...pantu baonaikile mumatololo.

¹⁰⁶ Panuma ya ifi fyonse ifyakupitamo, panuma yakulongana kwesu ukukalamba ukwakundapa uko twamona, panuma ya fisungusho fyonse ifikalamba ifyo twamona ukucitwa, panuma ya myumfwile yonse iikalamba iyo twakwete, iyakupunda nokulumbanya Lesa, ukunwa ukufuma muli cilya i Cilibwe, yonse amasambililo ayasuma ayo twasangalalapo, kabili nomba ukonaika. Fyonse ukupwa! “Fumeni pali Ine, mwe bakabomba ba mampulu. Nshamwishibe.”

¹⁰⁷ Moneni! Natukwata ukupuputulwa ukuleisa. Ninjishiba ici cintu cakosa. Lelo, munyina, onse wishi uushinga lungamika abana bakwe ninshi te wishi umusuma. Ico nacilungama. “Ukonaika.”

Nomba ifi fintu fyali ifilangililo fyesu,...

¹⁰⁸ Paulo alelanda. Bushe namucetekela ico? Cena cali cilangililo. Cisuma.

...kwipange ukutila tatufwile ukukumbwa ifintu ifyabipa, nga fintu bakumbilwe.

¹⁰⁹ Kuti mwaingililamo umwaume naiminina, uyo ni kemba, kalisha wama seleti, kabili alelisha ishakale ishafiko inyimbo ishakushana kuntanshi nakunuma, kabili, “Icintu cimo calicitike, kabili Nalitutwime nganshi,” neshapusana ishafiko inyimbo shakale isho Elvis Presley nabo abalumendo balisha, kabili baisa bwela nokupashanya ukushimikila i Mbila nsuma? Tontonkanyeni pali ico!

¹¹⁰ Bushe kuti mwaelenganya umwaume no mwanakashi nabekala kunse, kabili no mwanakash nalala palubansa kulukungu, nefyakufwala ifyamoneka fiko fiko, aleiposa

pantanshi ya baume, kabili nomba abwela nokunwa ukufuma kuli ici Cilibwe cakumupashi, nokubilikisha nokutwalililal?

¹¹¹ Kwaliba isambilisho ilikalamba mubantu abena Pentecosti, pakulubula abanakashi. Bena nabafwala ifikalamba, amasikiyo ayatali, no—nokufwala imisango yonse iyafyakufwala.

¹¹² Kabili umulumendo aikele pantanshi ya ng'anda yandi, inshiku ishinono ishapitapo, mucimbaya mbaya icinono, alelila, ukutula umukashi wakwe... Pentecosti, alalandila mundimi, alapela ubusesemo. Icine cine. Kabili ukutula, "Ichalichi conse cilafwala bakaputula." Kabili ena... "Alaya mu musebo, pa eiti na naini koloko yabushiku, aletola utushiki twafwaka uto bambi baposele, nokutupepa. Kabili ninshi alebilibikisha, alelumbanya Shikulu, nokupela ubusesemo."

¹¹³ Naliminine ubushiku bumbi muchalichi, umo umuntu umukalamba uwakwa Lesa, uo Nakwatila umucinshi uukalamba, kabili alesokolola ici. Panuma yaumo pa baume, uwaba umo pantungulushi yaciko, afuma, kabili—kabili alenga onse uyu umulopa ulefuma mu ndupi shabo nefintu. Kabili ishiwi Lyandi lyalikoma, ukufuma ku kabanga, ukufuma ku mboshi, pakweshu ukwebaula ico cintu, pabwiminishi bwa Baibele. Lintu, cena tecakwa Lesa.

¹¹⁴ Umulopa uuli onse uyo wingesa ukufuma kuli Kristu kuti waba u Mulopa wa buntunse, nomba u Mubili Wakwe uufwa nga uli pano, ninshi Ukwisa kwa cibili kwalipita. Yesu atile, "Mwicetekela ico, ilyo batila, 'Moneni, Ali muciswebebe.' Mwicetekela ico, ilyo batila, 'Ali pano.' Mwicetekela ico. Pantu kukaba ba Kristu wabufi abakema, na bakasesema wabufi, kabili bakalangisha ifishibilo ne fisungusho, icakuti kuti cabepa nabalya bene abasalwa." Kabili Nalibilibikishapo palwa ico ukufuma ku kabanga ukufika ku mboshi.

¹¹⁵ Kabili mukulekelesha, ku West Coast, umukote Dokota Canada, uyo uwaba cibusa wandi uwapamutima, aliminineko. Naumbi umwaume, uwali maninja wamuntu umo uwatampile ici, umo pamisonkano iyi, aishile palya nokupela icikalamba icikulu... Atile, "Amafuta ayapwililika no mulopa wa mushilo. Umulopa wesu uli nokulangwa ileelo." Kabili balishwishe incende. Kabili alangishe ifyo, mwisamba lyamushipi wakwe, alikwete inyeleti shibili ishasontele panshi.

¹¹⁶ Umuntu onse alishiba ukutula kuti watunga uyu munwe, kabili umulopa tawafume kano waufina. Nga watulamo icipunda, tekuti ucite ico, pantu imishipa shipa yaliba iyataluka nganshi ukufuma palya. Kabili ilyo acitile ico, alangishe ifyo acitile.

¹¹⁷ Alikwete amafuta kunuma *uku*, abikile indupi shakwe pali yena. Nomba aishile nokutula, "Mona ukuboko kwandi, kwena kulifye bwino." Nomba atile, "Ubukata kuli Lesa! Alleluya!" Kabili aimishe amaboko yakwe nga ifi. Mucine, mwali umulopa

uwafininwe muminwe yakwe. Ilyo abantu bonse balepunda, akumwine umutwe wakwe, kabili kwali icapindama. Ilyo, umwaume wine uyo wali no mwaume uyo wacitile ico, ico cali palya, aciletele palwalala kulya kwine kuntanshi ye bumba, na . . . aingishe mwitumba, nokulangisha amafuta nefintu.

¹¹⁸ Umo abikile umutima pacibumba, nokutula, “Ici cibumba cilepema u Mulopa wakwa Yesu. Uyo emutima wakwa Yesu.” Umutulushi umukalamba umwina Texas alingile, taletina. Atile, “Ngo muntu aikatako, kuti afwa.” Balikwete imyando. Bonse balikwata ifikope fya ico nefintu fyonse, kulya, uko ici cibumba calefumya umulopa, ukupema umulopa ukufuma kumutima umo. Kabili umo umuntu aingila nokusokelela mu chalichi, ena no mukashi wakwe, baishilesamfya ilya penti ukuifumya kucibumba, nokwikala kunuma kulya nokulolela. Ilyo aishile kakumba atile, “Ukuba, namwishiba, Yesu aciba muno noku ufumyapo.”

¹¹⁹ Atile, “Yesu takwetepo icakucita na wena. Nacitilefye ici, palwandi.” Ico nacilungama.

¹²⁰ Ni cinshi icacitike? Ni pa mulandu abantu tabasambilishiwa, pa Cebo cakwa Lesa uwa mweo. Bushe Baibele tayalanda ukutula, “Bena bali nokuya ukufuma ku kabanga, ukufuma ku mboshi, ukufuma ku kapinda ka kukulyo, naku masamba. Kuti kwaba icipowe, te ca mukate na menshi yeka, lelo pa kumfwa kwa Cebo cakwa Lesa”? We bushiku tuleikalilamo we!

¹²¹ Kabili tulemona nomba ukutula amachalichi aya ayakalamba ayafilonganino yonse yaleyampanya capamo, kabili califika pancende iyo ufwile waba kucisaka cama chalichi ilyo taulakwata iyapacilimba. Walifuma kucilimba. Mune, wilasakamanapo palwa ico. Kabili nefyashala fili, pamo nayonse ama pologolamu yapacitunshi tunshi. Ufwile waba mucisaka cama chalichi ilyo taulacita ici. Kabili ilyo mwacita ico, tamulepanga icintu nangu cimo mwisonde lelo ululembo lwa ciswango, ulwamu Baibele. Ici cili apa. Mwamona efyo caba icakwampana pamo?

¹²² Oh, ukutotela kube kuli Lesa, kwaliba mucine Lesa uwa mweo. Kwaliba mucine Shikulu uwacine. Kwaba mucine i Cebo icacine. Kwaliba mucine ukundapwa ukwacine. Kwaliba mucine ifi fintu. Lelo, munyina, wikesha ukubika icitetekelo cobe pafyakumfwa umfwa fimo ifinono, pa butantiko bwa chalichi, pakulya umulalilo, pakulya ukufuma ku Cilibwe ca kumupashi.

¹²³ Mwatila, “Nalishiba *ici*, munyina. Nalisonda pali Lesa.” Ico kuti caba fye icishinka. Lelo nincende ya musango shani iyo caponenamo? Ico e cintu cimbi icilekonkapo. Musango wambeketi nshi yaishilemo? “Umulungami noushalungama.” Nomba kutikeni.

*Nomba ifi...fyali filangililo, kwipange ukutila
tatulingile ukukwata ulunkumbwa pafintu fyabipa,
ngefyo bena bakwete ulunkumbwa.*

¹²⁴ Ulunkumbwa lwabo ni cinshi? Nomba, kutikeni, Ndefwaya ukuya pantanshiko panono, nga muli nokumbelelako uluse.

Nangu ukuba bakapepa watulubi, . . .

¹²⁵ Oh, imwe watila, “Ndetotela Lesa, Nshili kapepa wa tulubi.” Lolelenikofye panono. Natucibebete ukupitila mu Cebo. Watila, “Ine tekuti mpepe akalubi.” Ico tacilepilibula fye iwe ukupepa akalubi. Taulingile ukucita nangu cimo, ukukana cita icintu nangu cimo. Waya ku chalichi, “Ee, ico cili fye bwino.” Wabwelelamo ku ng’anda, ukwabula ukucitapo nangu cimo palwa Cena.

¹²⁶ Munyina, umwaume uwafyalwa cipya cipya umwaume nangu umwanakashi tekuti eminine shilili. Mwaliba Icintu cimo muli bena. Balingile ukupelo bunte. Balingile ukucita icintu cimo. Bena bali nokucita icintu cimo. Bena tekuti bekale tondolo. Kutikeni.

*Nangu imwe ukuba bakapepa wa tulubi, nge fintu
(bena) bali bamo muli bena; nga fintu calembwa, Abantu
balikele ukulya nokunwa, kabili baimine ukuti bangale.*

¹²⁷ Cinshi ico Paulo alelandapo? Ifilangililo. Babatishiwe muchalichi. Bena mucine balikwete ulubatisho ulwalungama. Inshita imo; imiku itatu kuntanshi; kunuma; mwi shina lyakwa Taata, Mwana, Mupashi wa Mushilo; Yesu fye; conse fintu cali, bena balikwete ulubatisho ulwalungama, bena balibatishiwe bwino. Tulakansana nokukalipa, no utalikishanya pafintu ifinono ngefyo. Busuma nshi cena cicita? Mulesha ifunde ilikankala. Amachalichi yesu yalipatukana, palubatisho. Mucine.

¹²⁸ Nomba iwe watila, “Oh, alleluya! Bena tabakwata amapalo ya kumupashi ayo twakwata. Bena baliba abatalala nganshi, abafyakukonka. Ubukata kuli Lesa, Nalilya Manna yakwa Lesa iyacine. Nalishiba ukutila Cena Cine.” Ico cishinka nganshi, lelo bupusano nshi ico cipanga? Watila, “Munyina, Ine. . . U—u Mupashi wa Mushilo mucine ulawa muchalichi cesu.” Ico cisuma, lelo bupusano nshi cipanga kuli imwe, nga cakutila tauli cipe icalungama ico Uleponenamo? Ibukisha.

¹²⁹ Oh, watila, “Ndi wacishinka.” Efyo nabena bali. Balishile amayanda yabo nokuya, nokubika imikoshi yabo, icakuti imfwa ingakonkapo. Balicitile ifingi ukucila ifyo tulingile ukucita. Ico tacakwetepo nangu cimo icakucita nacena. Tontonkanyafye.

¹³⁰ Baibele itila, “Ba Mpepa apaf ye. Pa fye epo ba Nshinshimuna.” Ukupepa ukwapwililika nganshi, apa fye. Nikwisa kwatampile? Kulya kwine kwibala Iya Edeni, Kaini. Ashinshimwine Lesa umusango fye umo wine ngefyo Abele

acitile, lelo pa fye epo a Mushinshimwine. Ee, mukwai. “Kwaba inshila iyo imoneka iyalungama ku muntu.”

¹³¹ Watila, “Ukuba, cinshiabela cabela ifi? Nomba Nalilapila. Mulandu nshi Nshabela bwino? Nalilapila. Ndetontonkanya ukutula Nabafye bwino ngo muntu onse umbi. Ndaya ku chalichi. Nalibatishiwa. Nalikwata amapalo yakwa Lesa. Nalitemwa imbila iisuma. Nalitemwa i Cebo cakwa Lesa. Nalitemwa uku Cibelenga. Kabili Ndakwata amapalo aya kumupashi, pamo. Kabili, alleluya, kuti Nasesema. Kutinalandila mundimi. Nalicita fyonse, kabili ulepilibula ukutula, ‘cena ca fye?’”

¹³² Nomba, Nshilelanda ukutula cena cafye, lelo cena kuti cacitwa ukutula kuti caba apa fye. Ico nacilungama. Cishintilafye pafyo waba umo, ico nacilungama, ifyo waba ulepokelela ici. Nga cakutula tawafyalwa cipya cipya, nga cakutula icine cine tamwaba icintu cimo muli iwe, nomba ninshi cena caba fye ica fye. Amapalo yonse, Nshifwile ukucita. Nomba fye naimbi imo.

*Kabili twicita ubulale lale, nga fintu bamo bacitile,
kabili baponene mu bushiku bumo amakana amakumi
yabili nemyanda itatu.*

¹³³ “Ukucita ubulalelale,” ico bulalelale bwa kumupashi. Nga twalikwete inshita...Isukulu lyapa Mulungu nalipwa. Ubulalelale bwa kumupashi!

*Kabili twiesha ukwesha Kristu, nga bamo muli bena
baeshe, kabili balyonawilwe ku nsoka.*

*Nangula imwe ukuilishanya, nga bamo abamuli
bena...bailishenye, kabili balyonawilwe kuli konaula.*

¹³⁴ Ukuilishanya, ulunkumbwa, ukusakanya isonde nabuka pepa bobbe, ukuya...Lesa alitemwa uwasangululwa, uwasangululwa icine cine.

¹³⁵ Muno lucelo, Nacilalanda. Nacitontonkanya ukutula, “Cinshi...” Nomba, mukwisalila, Nacitontonkanya ici: “Ni cinshi icawamisha mu mweo wa muntu? Ni cinshi icawamishapo ukucila ukwisa ku ng’anda, ilyo ali uwanaka nokufunshika, ne mbeketi yakwe inono mukuboko kwakwe, ukufuma mukubomba akasuba konse, nangu ukulima, nangu conse ico engaba, ukwingila mukati nokukwata umukashi umusuma uwakumukumanya pa ciibi? Aikala pamolu yakwe pali miniti, nokumukumuna pampumi panono, nokumutomona pe saya, nokumukumbata, nokutula, ‘Wemutemwikwa, Ni—Ninjishiba ukutula naunaka, naubombesha.’ Amupela icitalaliko.”

¹³⁶ Ifyo eshiba ukutula ukuboko kulya, ukumukumbete, kwakwe umupwilapo. Kwena kwakwe. Takwatala akukumbata umwaume umbi nangu ubukabilo bumbi. Ukutomona ukuli petobo kufumine kuutuntulu, uwasangululwa, uwamushilo umutima uwamutemwafye eka, kabili eka fye. Efyo

cikulenga...Ninjishiba, cilakulenga ukufumya icifuba cobe, nokutila, “Oh, Nshinakile, nangu cibe ifyo.” Mwamona? Ifyo efyo. Cena cilacita icintu cimo kuli iwe.

¹³⁷ Ndefwaya ukumweba icintu cimo. Lelo nga cakutla kulya ukutomona kwabikwa pa masaya yakwe kabili takwata ukucetekela? Kwena limbi kwali pa masaya ya muntu umbi. Nga cakutla ayo amaboko aya mukumbete yalakumbata umuntu onse, kabili alekabila ukucita icintu cimo cine? Tekuti cipilibule icili conse. Takuli ukwikata ukuli konse apo. Mulandu nshi?

¹³⁸ Nomba, mukutendeka, bena bali umo. Lesa, ilyo Alengele umuntu, Amubumbile umuntu pabili, fyonse fibili umwaume no mwanakashi. Amupatwile, mu mubili; nokumubika pano pesonde, mu mubili, kabili ulubali lwacanakashi lwali lucili mu mupashi.

¹³⁹ Mona, cibusa wandi, Lesa ali uwacenjela nganshi. Oh, ifyo ici...Wileka cena cifume pali iwe. Lesa tatalile enda ulukungu mulupi lumo nokupanga Efa; ena akwete ukubumbwa kumbi. Kabili ena te cibumbwa. Ena cintu cafumishiwako fye. Kabili Lesa aya mu mutima wakwa Adamu, ulu lubafu, ukufuma fye pesamba ya mutima wakwe, nokusenda ulubafu no kupanga umukashi. Kabili iciputulwa cine ica mupashi wakwa Adamu cali mu mwanakashi, kabili bena babili baba umo; umweo, umubili, umupashi, bena baba umo. Bena ni ba umo abapwililika. Umwanakashi umwine mwine...Kabili umulume umwine mwine, umukashi umwine mwine, bena baba umo, capamo.

¹⁴⁰ Cena cipasho nshi? Kristu, ukufuma kunse ka cifuba Cakwe! Te cafumishiwakofye, te Methodisti, nangu Baptisti, nangu icakutota caba Pentecosti. Iyo, mukwai. Lelo ukufuma mu mutima Wakwe Umwine, Asendele Umutemwikwa uyo waba uwasanguluka kabili uwacumfwila ngefyo Engaba. Aba uwacumfwila nga cananika.

¹⁴¹ Lolesheni pali ico, lolesheni kunuma uko kuli Solomoni uulelanda, “Isa we citemwiko candi, natwende mu mapangwa. Leka tukwate icakaniko kukutemwa kwesu.” Kabili ilyo uwacetekela umwine mwine aisula amaboko yakwe no mutima uwasanguluka, kabili aimya kuli Kristu, icitemwiko camutemwikwa Kristu kuya mucifuba Cakwe. Ena Mukashi Wakwe, nga fintu umulume acita ku mukashi umwine mwine.

¹⁴² Muntu wa musango shani tulingile ukuba? Bushe tuleangala bucilende, na Kristu? Bushe tuleshintilila pa cintu cimo icinono, nokubutukila kwisonde nefintu ifya mwisonde, namano yamwisonde, kabili tekulya ukutemwa ukwacine nokuipela uko tufwile ukukwata?

¹⁴³ Bushe kuti waingililamo, owe, bushe kuti waingililamo umukashi obe, munyina, aisa nokwikala pamolu namasiketi yamalesi nasiketi yamukati nefintu fyamaleshi,

nemishishiyakwe nasakula bwino, nakaka, nafyonse ifyaba ngefyo? Akukumbatila, nokutila, “Oh, Yohane, Nalikutemwafye, *ukutomona, ukutomona, ukutomona*, Nalikutemwa.” Kabili nawishiba lilya line ukutila kuliko icintu cimo icalubana. Tawamucetekele, te mulandu ifyo amoneka uwayemba kabili nefyo aipekenye bwino. Imwe, nga tamukwete kulya ukushininkisha ukwapwililika muli ena, kuliko icintu cimo icalubana. Cena tacicita—cena tacikusha kulyo kukabila uko umwame engakwatila umukashi wakwe.

¹⁴⁴ Nomba itontonkanyefye wemwine uleangala nesonde nokupelela kwisonde, nokwisa fukama pamakufi yobe, uktilaa, “O mwe Shikulu Yesu, Nali Mutemwa.” Kweni kwakoca, ukwakwa Yuda, ukutomona ukwa ukwabu bumbimunda. Ico nacilungama. Tontonkanyeni pali ifi fintu. Kuli ukupuputulwa ukuleisa nombi. Mwamona?

¹⁴⁵ Oh, iwe limbi kuti wafwala ininda minwe yabwina, ico nacilungama, lelo iwe tauli umukashi. Oh, iwe limbi kuti waba umwanakashi. Iwe limbi kuti waba namayo wapa ng’anda, lelo tauli umukashi nga cakutila iwe ulecita ifyo.

¹⁴⁶ Kabili iwe tauli umwina Kristu wacine, iwe tauli icipe icituntulu icakwa Kristu, nga cakutila tawa Mutemwa mufintu fyonse ifyo wakwata mukati kobe.

¹⁴⁷ Nshilesakamana nanagu wingamoneka uwaemba, nangu tauli musuma, wali Mutemwa kabili ulalondolola. Ilyo e lintu imwe babili mwaba umo; ilyo e lintu Kristu ne Chalichi Cakwe. Tekucilonganino, tekulubatisho, tekufwakumfwa umfwa; tekucintu iciliconse lelo kucitemwiko icituntulu eco mwashitilweko, ukufuma pa cifuba cakwa Lesa, ilyo Acenenwe kulya kabili Alikushitile. Kabili nokutemwa kobe na bucishinka bobbe, kabili nokunakila kobe, kuleshininkisha ico waba. Mwamona ico Ndepilibula? Nga naupomponteka, nangu uli. . .

¹⁴⁸ Nshilesakamana nga cakuti umukashi wandi tasakula imishishi shakwe, nga tafwala ilaya ilisuma, nangu tatala. . . Kulya kuti aba umutemwikwa wandi. Ndamukumbwa kumulandu wakunakila kwakwe, ubulumba bwakwe. Ifyo aba, ifyo efyo aba.

¹⁴⁹ Kabili ukupitila mu baume abena Kristu na banakashi, ifyo efyo twaba mucinso cakwa Lesa. Temukutila kuti twaya kuchalichi cawamishapo, nanagu nga kuti twafwala bwino, nangu nga kuti twaingila muli *ici* cipanda, nangu kuti twacita *ici*, nangu kuti twanina muli *ici*, nangu kuti twacita *ici*, na *ico*. Ico tacikwete nangu cimo icakucita neco. Cena maka ayakunakila kwesu nokutemwa kwesu kuli Kristu. Kabili uko e Kufyalwa. Ico e cintu ico icisa.

¹⁵⁰ “Kabili nangula Ningalandila mundimi sha bantu na ba Malaika; Nshili nangu cimo. Nangula Ningalisha abalanda;

nangula Ningapela ifipe fyandi; nangula Nacita *ici*, nokucita *ico*, nokucita *cilya*; Nshili nangu cimo.” Cinshi ico Kristu asakamana pafyo iwe wingacita, kabili naconse ico iwe wingacita ngefyo, nga uwacine, icitemwiko icacine nokunakila takulipo? Tontokanyeni pali ico, bushe tamwacite ico?

¹⁵¹ Ili lisukulu lyapa Mulungu, kabili, ibukisheni, ilyo lisambililo kuli imwe. Ube, mu mutima obe, leka Kristu akwate icifulo cakubalilapo, nga filya umwanakashi umwine mwine engacita ku mulume wakwe. Tapali amaboko ayengamwikata, tapali. Takuli ukutomona nakumbi, temulandu efyo kwingaba ukwakutemuna, kabili apilibula umutwe wakwe. Alikwata ukutemwa kumo uko kwatonta, kabili uko kwamulume wakwe. Ico nacilungama. Temulandu ifyo aba uwawama umulume wakwe, nefyo asakula nokumoneka bwino kwamishishi ingamoneka, kabili nefyo ena engaisunga umwine uwalungama. Iyo, mukwai. Tapali icintu nangu cimo. Alitemwa umulume wakwe, kabili ena eka fye eo atemwa. Alalekelako ubulumba nakonse ukutomona, konse ukutemwa kwakwe nefintu fyonse fya ba ku mulume wakwe, kabili ena fye eka. Mwamona ico Ndepilibula?

¹⁵² Kabili iwe ulalekelako ku intu fyonse ifya mwi sonde, temulandu nefyo cena cingamoneka icisuma, nefyo cena cingamoneka icayemba, nefyo cimoneka icakutemuna. Ubulumba bobbe ebo upendelwako.

¹⁵³ Elyo watila, “Oh, alleluya! Na—Nalishiba ukutula Naliikwata yena, pantu Nalicitile *ici*. Alleluya!” Kabili ukufulwa ukwingi icakuti kuti kwalwa na soyala.

Leka nkwebe, munyina, cisenda ubulumba ubo Kristu apela umucinshi.

¹⁵⁴ “Nangula Ningalandila mundimi nga bantu naba Malaika; nangula Ningapongolwela umulopa ukufuma mu maboko yonse yabili; nangula Ningabilikisha nokushana, mu Mupashi; nangula Ningalya i Cebo cakwa Lesa, noku Citemwa; nangula Ninganwa ukufuma ku Cilibwe cimo cine ica kumupashi ico abashala bacita; nangula Ndetota indupi shandi, ukubilikishafye nga bonse abashala.” [Munyina Branham atota indupi shakwe—Kale.] “Nangu Ningalila ifilamba fya ng’wena; nangu Ningacita fyonse *ifi*! Lelo nga ulyo utbuntulu, ubwine bwine, ubulumba ubwa bwina Kristu ubwine bwine tabuli kuli Kristu, uba nge camukuba icacongo, necakupama icacongo.” Paulo alesoka chalichi cakwe palwa *ici*, chalichi ca bena Korinti, ico, cali icasankanishiwa mu misango yonse iya fyakwelengenyanya.

¹⁵⁵ Ndemusoka, bacibusa. Ibukisheni, Nkasukilapo pali imwe pa Bushiku bwa Bupingushi, kabili nomulopa wenu tawakabe pali ine. Te mulandu ifyo mwaba abanakila ku cintu cimbi

icashala, beni abacumfwila kuli Kristu. Ibukisheni ico, ilyo tulepepa.

¹⁵⁶ Mwebapalwa Taata uwamu Myulu, muli iyi imibele yanomba, twaisa nomba nokulapila ku filubo fyesu fyonse. Oh, beni Abaluse, Lesa uwaluse. Kabili twapepa ukutula Mwalalolesha mukati ka mitima yesu. Kabili muli ino nshita ilyo tulelolola, nemitwe yesu iyakontama ku lukungu, lolesheni mumutima wamwaume umukote, mumutima wakwa namayo umukalamba, mumutima wamukulu, umwaice, nabana abanono. Kabili lekeni tuibebete fwebene.

¹⁵⁷ Tuleingila muli ulya mulungu uwa mushilo uo tulesefya nga Cisano Musuma ne Pasaka, ukubuka. Nangula uno mwaka ifwe limbi twali abanakila ku chalichi, nangula ifwe limbi nga twalile umulalilo, nangula kuti twabilikisha, limbi kuti twacita ifintu ifingi, lelo, O mwe Lesa, lolesheni mukati ka mutima wandi. Ndeilandilako nemwine. Lolesheni mu mutima wandi kabili mu mutima wa aba bantu muno muno lucelo, kabili tucencenteni, Shikulu. Nga kuliko icintu cimo icisenda icifulo cakwa Kristu, O mwe Lesa, cifumyenipo. Nga cakuti bunang'ani, ukufilwa, nga niconse cintu cingaba, Nshishibe. Lelo, mwe Lesa cifumyenipo pali ifwe. Oh, tatulefwaya ukufumishiwapo pano pene panshita yabulwi, ukufumishiwapo na Lesa nokuba umulwani Wakwe.

¹⁵⁸ O mwe Lesa, lolesheni mu mitima yesu. Tubebeteni ukubomfya Mupashi wa Mushilo Wenu, kabili lekeni tumone, muno lucelo, nga cakutula muli icintu icabipa muli ifwe. Nga kuliko ico, cifumyenipo, Taata. Ifwe nomba tulecibika pa cipailo, ukwenda nokucisha palya. Nga kukana cita nangu cimo, nga cipyu, nga nibu caibela, nga mulekelesha, nga fintu cingaba conse, nga cakutula lupato, nga cakutula mufulo, nga cakutula kutintana, nga cakutula kuti caba conse ico cingaba, O mwe Lesa, cifumyeni pali ifwe, ileelo.

¹⁵⁹ Kabili pali uku ukupuputulwa ukuleisa, lekeni tubefye abaisulamo ubusuma Bwenu, Shikulu, mpaka abengi baisamo nokupusuka, ibumba ilinono pano, apo twaeshe apakalamba nganshi. Ukupuputulwa kwakubalilapo nomba mumyaka ikumi, uko Nkwete. Nomba, Napepa ukutula Mwalatupela ulyo utuntulu, umupashi uwacine mu mitima yesu.

¹⁶⁰ Kabili lekeni cikabe kulya ku Muyayaya. Cipeleni, Shikulu. Tulekeni tuibebete fwebene, fwebantu baupana, oefyo tucita ku bakashi besu, efyo twaba nabucishinka, nangu ifyo abakashi besu baba abacine kuli ifwe. Kabili lekeni tuye fye mu mitima yesu, muno lucelo, ifyo twingatontonkanya nga cakutula icintu caifyo cacitike mu ng'anda yesu. Kabili nomba lekeni ifwe tupilibule ifyakutemwa fyesu ukulola kuli Imwe, nokutula, "O mwe Lesa, nkwatileni uluse."

¹⁶¹ Oh, nga—nga cakuti umukashi kuti acita, inshita fye imo mumweshi, aisafye nokubika ukuboko kwakwe pakobe,

nokutila, “Wemutemwikwa, Nalikutemwa,” nokufumapo, oh ifyo cingamoneka kwati nandekeshesha, ifyo cena cingamoneka ukutila icintu cimo nacilubana. Kabili Lesa, lintu limbi umuku umo pamweshi, nangu umuku umo lintu twaya ku chalichi, tulapela ipepo ilinono! Oh, Mulefwaya ukutemwa kwesu, ne—ne—senge lyesu, inshita yonse, kabili amatontonkanyo yesu na mapange ya mitima yesu yalaikala pali Imwe. Cipeleni, Shikulu.

¹⁶² Oh, sungeni imitima yesu ukuti ikale pali Imwe, ukutila ifintu fya mwisonde fili nokuba ifyapofula kabili nokukana sakamana. Cipeleni, Shikulu. Tumfweni nomba, kabili tupaleni mu ciputulwa cimbi ica uku kulongana. Twalombela mwi Shina lyakwa Kristu. Amen.

¹⁶³ Nomba, Shikulu amupale, bwino nganshi. Kabili Ndi... Munjeleleko Ninsenda ama miniti nayambi panuma ye sukulu lyapa Mulungu ukupwa. Kabili Napepa ukutila Lesa ali nokumupala. Teine nandile ifi fintu; ici cili kunse ya Cebo cakwa Lesa. Bena bali filangililo kuli ifwe. Bena filangililo.

¹⁶⁴ Kabili nomba, cibusa, kuti waumfwa shani nga cakutila waishiba ukutila umukashi obe aali ni kafutuka? Tontonkanya palwa cena. Citontonkanyepo pakashita. Nicinshi ico wingatontonkanya?

¹⁶⁵ Nomba nga waisa kuli Lesa, kabili niwe kafutuka, wilacita ifyo. Natube abacine. Taufwile wabula ifyakumfwa umfwa. Tekuti ubule icintu cimo icapusanako, lintu imyulu yonse yaisulamo ukutemwa ukutuntulu ukwakwa Lesa. Mulandu nshi wingabulila icakupyanishapo nelyo twalikwata icituntulu? Cena cenu. Nomba lekeni Shikulu amupale, ilyo Nabweseshu ukulongana kuli ba kakumba wesu.

¹⁶⁶ Kabili mwilabako uno mulungu, nomba, uku ukupuputulwa ukunono kwa bantu bamuno ncende nemisumba iya ushinguluka. Mukaye pali lamya wenu, mukatumine umuntu umo, mukamwebe akese. Tuli nokukwata ubwite bwakucipailo, kabili tulesubila ukukwata inshita iisuma, uno mulungu, muli Shikulu.

¹⁶⁷ Shikulu amupale mpaka Nkamumone pali Citatu cileisa munshita yabushiku. 

57-0414 Abena Korinti Ibuuku Lya Kulungamika
Branham Tabernacle
Jeffersonville, Indiana U.S.A.

BEMBA

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti lya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalemwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org